

Hefe di servicio veterinario Pieter Barendsen ta muestra cu

E problema di sobre poblacion di cacho na Aruba por haya solucion pa medio di ley nobo di cacho

E ley ta cla pa bai Parlamento awor pa aprobacion

ORANJESTAD – Durante un reunion recien entre servicio veterinario y polis y mas autoridad, a bin compronde cu e problema di cacho na Aruba tabata basta serio y grandi. Mirando esaki, hefe di servicio veterinario Pieter Barendsen a pone un lectura den otro pa polisnan di bario e siman aki. Tabata e intencion di pone nan hunto cu entre otro instancianan manera Animal Rights Aruba y despues a bin acerca tambe representantenan di FCCA. Barendsen ta muestra cu e ta contento di e resultado aki unda cu a pone e polisnan di bario na altura di e ley nobo riba cacho, cu proximamente tin cu wordo introduci na Aruba. E ta actualmente un concepto cu a pasa e canalnan oficial manera Raad van Advies y cu awor tin cu bai Parlamento di Aruba pa por wordo aproba y implementa como un ley. Segun Barendsen, a pone e polisnan di bario na altura, y ta bon pa prepara nan riba esaki. E la spera mas audiencia e

siman aki na Barcadera, unda cu tin 18 polis di bario pero a bin un grupo mitar di esaki. E discusionnan cu a surgi durante e lectura aki, tabata uno positivo pa Barendsen. Segun e veterinario di profesion, e problemanan tabata hopi reconocí. Den bario tin hopi hende cu tin probable cu cacho pues e ta algo hopi aplicabel. Di otro banda ta difícil pa haya instancia corecto ora cu tin cu atende cu e problema di cacho. Tin hopi instancia cu ta traha riba e tereno aki pero nan ta traha riba nan mes. E no ta solamente un tarea di polis pa resolve un problema di cacho. “Ta na prome lugar tarea di e doño di cacho pa resolve un problema di cacho” Barendsen ta bisa. Pero e problemanan ta sali for di man y tin cu yama instancianan cu tin cu bin resolve e problema. E problema cu servicio veterinario tin na Aruba ta cu nan tin cu pone hopi cacho drumi durante aña. Ta menciona cifra di entre 6.000 pa 9.000 cacho cu ta wordo



mata durante aña pa servicio veterinario, di cual 96% sigur ta cachonan malo, indesea etc. Masha poco ta cachonan cu a biba nan bida completo y cu ta muri natural. Pero porta e problema mas grandi cu tin na Aruba ta cu tin mucho cacho riba nos isla. Durante e presentacion e siman aki, a resulta cu pa

cada 4 hende na Aruba tin un of dos cacho. Si compara esaki cu p.e. Alemania, einan tin un cacho pa cada 12 persona. Pues tin un sobre poblacion serio di cacho na Aruba. Si tur e cachonan aki tabata wordo bon cuida, ta otro cos pero esei no ta e caso. Loke a resalta segun Barendsen ta cu ARA y polis

di bario a conecta cu otro den un forma positivo. ARA tin un ambiente positivo pa mehora e situacion di cacho na Aruba. Pero di otro banda, ARA so no ta e man fuerte manera polis. Di otro banda polis no por actua duro cada bes. Mester di informacion y concientisacion pa asina hendenan por bira mas conciente di trato di cacho.

Polis di bario Johnny Henriquez contento cu lectura di Servicio Veterinario

Implementacion di ley nobo di cacho lo arma polis miho pa solucion problema di cacho den bario

ORANJESTAD – Un di e problemanan grandi cu polisnan di bario (Barrio regiseur) ta confrontando ta e problema di cacho. Tanto cachonan di caya como esnan cu tin doño. Y durante un lectura door di Servicio Veterinario e siman aki pa un grupo di polis di bario, esaki a bin dilanti. Polis di bario Johnny Henriquez ta confirma cu entre varios problema cu ta confronta den barionan, esun di cacho sigur ta un problema.

Y awor cu tin un lei nobo di cacho ta bai wordo pasa dentro di poco, e lo por duna polisnan mucho mas arma pa por actua contra e problematico aki di cacho. Leynan actual ta hopi anticua y polisnan hopi biaha ta man mara y no por actua debidamente pa resolve hopi problema cu ta ensera cacho. Y esaki siendo cu e ta un punto importante di nos isla. E hecho cu Veterinario Pieter Barendsen a duna e lazing sigur ta un bon cos. E por a compronde

di Barendsen cu e ley ta cla pa bai Parlamento pa wordo trata, despues cu e la pasa tur otro lugar cu e mester a bai. Despues di Staten e lei lo tin cu wordo aplica.

Henriquez ta confirma cu mayoria hende cu ta cana riba caya por bisa cu tin hopi cacho ta cana los, y cachonan cu tin donjo ta wordo negligia door cu no ta wordo cuida pa nan manera mester ta. Cachonan por morde hende y tin hopi keho cu polis di bario ta haya. Tin cu atende hendenan riba esaki sea via hendenan mes of FCCA. Esaki pasobra hopi biaha ta trata di hendenan cu ta biba den e areanan di casnan di FCCA unda cu tin hopi hende riba otro y cu ora cu tin cacho, e ta bira un problema. E hondenverordening lo por ta definitivamente e solucion pa elimina e problema grandi di cacho, pero tambe cu tin reglanan cu ta stipula e ora unda cu polis di bario por tin un man mas duro riba hendenan cu ta bai contra e reglanan aki. Tin un

multa di polis di maximo 10.000 florin cu sigur lo haci un diferencia den esaki.

Loke tabata bon den e lectura aki segun Henriquez ta cu tabatin un intercambio sano entre polisnan di bario y algun representante di FCCA y tambe Animal Rights Aruba. Esaki a pone cu hopi cos cu ambos partidonan no tabata sa di otro, a wordo clarifica y a intercambia di informacion, idea y solucion pa futuro unda cu esaki lo por yuda tanto polisnan di bario como e organisacionnan manera ARA.

Segun Henriquez, esaki tabata un setting perfecto unda cu tur hende a bin hunto pa pone e cosnan riba un liña y mira den e mesun direccion. Cuerpo policial por tene nan mes ocupa cu nan trabou, y ARA lo por controla e animalnan di nan banda y asina por yuda otro pa mehora e situacion di cacho na Aruba.